

富順縣志卷之一

星野志

萬物之精上為列星在天成象在地成形天有分星地有分  
野二十八宿周天之下合蜀於秦井鬼同辰入參三度介巴  
與蜀爰放天文志為首錄志星野第一

卷二十三

書名 富順縣志  
三十八卷  
道光七年刊本  
撰者 清 張利貞等 修，  
清 黃靖圖等 纂  
卷 卷二十三

內容分類 史-地理-今地志-四川  
索書號 史部-地理-都郡-237  
編號 B2662000

[彩色首頁1](#)

[東洋文化研究所漢籍目錄 編號: B2662000](#)

[東洋文化研究所漢籍目錄所藏漢籍善本全文影像資料庫 索書號: 史部-地理-都郡-237](#)

[漢籍善本全文影像資料庫文本富順縣志三十八卷 道光七年刊本](#)

[版權所有: 東京大學 東洋文化研究所](#)  
[使用上的注意事項](#)

富順縣志卷二十三

孝義志

宋

劉孝誠事親至孝親亡廬居墓側哭泣頓絕朝夕無怠有芝草生墓傍李見紀其行於雁塔

李夔字虞卿父母葬廬於墓側有白兔白鳥馴致之祥

余必華字尙綱性孝友博覽古書每以修身立倫爲子弟勸宣宗開禧年間弟必顯不羈觸法坐棄市以無子深自慟悔必華私謂妻徐氏曰弟抱恨死殊不堪吾將代之徐泣允必顯覺力阻之必

華錮顯於別室請官所就刑迨必顯得脫請囚已不及矣號泣負屍以葬之

明

黃璿字公瑾年十二祖母病渴思螺湯時天寒冰凍家人遍求不得璿往田中忽於冰底得螺四十枚持歸作湯以進祖病愈後璿於永樂乙未成進士歷官中外致仕歸築室錫溪以奉母母歿廬於墓芝草生塋尙書夏元吉都御史顧佐祭酒李時勉胡儼等有詩美之

甘志高養母陳氏以孝聞永樂甲午母年九十二終朝夕哭踊頓絕方甦七日始啜粥飲水不進鹽味營葬四里坎廬於墓側負土成墳泣血三年不離墓所及終喪行掃祭之禮然後歸時年六十矣以疾卒於家入忠義祠

鄒玉字仰珍正統中入粟助邊授永寧衛所鎮撫後累陞撫軍前衛指揮僉事

黃必高荒歲賑饑焚負券數百紙

李繼宗性寬厚嘗獲竊粟者曰彼窘於饑爲此吾不能賑忍置於法乎釋之入忠義祠

何文富貯穀濟貧居臨大道每烹茗及饘粥以給行者鄉人舉於

官以爲鄉正

吳可賓縣學生員值荒歉收養遺孩五十餘人歲熟各還其家  
張冕字時貴貢生任照磨性謹厚尤篤友愛里黨稱之

周安字正義周宥字正禮宏治中知縣周熊誌畧曰二公皓首同  
居百口一門永無間言和氣致祥田舍生連榦梨一株瑞竹一竿  
高五尺許分作二竿麥生二三穗者四五本池蓮開並頭花者三  
知縣邱齊雲贊曰百口一堂和氣致祥竹梨荷麥穗榦奇特公藝  
之風誦說未終入忠義祠

錢金定字國容號松坪多隱德南沙熊過撰墓誌畧云隱君雅尚  
高潔不樂仕進平生善行多端功德尤著三值年饑共發貯穀二  
千八百餘斛以全生命又云錢氏自省一入蜀來世世殷富然尙  
樸素隱君始出經教子弟故後登科甲者名盛一時等語孫節用  
隆慶辛未進士曾孫夢臯萬歷己丑進士仕刑科給事中祀鄉賢  
夢曾甲戌進士夢夔丙子舉人

劉福壽爲人謹厚曾拾遺金二百坐待失主給還早卒妻魏氏守  
節奉勅建坊子朝海宏治壬子舉人孫用中丙辰進士登科第者  
累葉不替咸稱善報不爽云

閻健行誼篤厚孝事二親父病嘗刲股救之及歿廬於墓所且能

郤產歸宗蠲業貽族上里甲調停之議均驛傳徭役之條皆鑿鑿可行屢經縣令嘉勸

甘化霖字公育爲霖弟嘉靖辛卯舉人平易方正有古君子風授萬縣知縣堅乞終養尋卒

劉以真性好施值歉歲散穀於人不責償得全活者亦衆

史仲安性慷慨有經過遺孤名回保者憐收養之後訪爲馬湖人其家宗祀已絕出貲婚娶遣歸又舊識陳仲良遺女無託備妝嫁宜賓人任紹義龍市鄉有孤女名萬觀音父母早亡收養長成貲遣爲人妻平生好施類此入忠義祠

曹承熙歲饑積粟周貧不能償者皆無所責入忠義祠

胡志海性好扶艱力不及者率無所靳嘗取積金積書積陰德數語訓誡子孫其子深登景泰辛未進士入仕戶部主事有節概人謂積德之報入忠義祠

劉朝海字會山年五十登宏治壬子鄉薦傷母魏氏拾禾教子之苦未及見已成名遂廬墓終身不忍遠仕亦不受子用中誥封遺命以孝廉禮葬

黃欽字敬之嘉靖戊子荒旱賑穀一千石都御史唐鳳儀題奏授敘南衛指揮使入忠義祠

余爵字廷祿養母以孝聞母卒哀毀踰禮寢苦塊酒葷不入口盛暑不持扇蓋朔奠以常儀有鼠在棺嚙擾爵驚懼具衰絰哭於柩前次日鼠斃泣處田禾有一莖五穗之祥及葬廬墓三年後致羸疾卒入忠義祠

劉懋和字保之潛孫崇禎貢生授行人奉母盡孝工詞賦邑稱文行兼優弟懋能亦工詩其秋日山中卽事詩云山深閉戶客來疎谷口歸雲擁傲廬鳥宿暗聞山果落鹿眠驚起野春初夕陽扶杖聽流水午夜烹泉點素書但放詩思容自瘦不因秋雨病相如可想見其人

劉棕邑廩生用中子讀書修行鄉族推重子三承誼進士官至廣東叅政承諫廩生承許孝廉北直靈壽縣知縣承諫厚重以子之龍貴封通奉大夫邑中推重其行

郭繼隆字思道由瀘州庠生入太學歲凶出穀平糶施藥餌義棺建義塚五百餘槨修鎖江橋振鱗橋以利行人因建義助征奢賊功授敘南衛指揮僉事准世襲以子運暄貴加贈武威將軍

黃輔余釗鞠勝茂彭德真金珠吳誠李政歐時用八人各輸穀千石入預備倉明正統間知縣李真上聞奉勅獎諭旌爲義民

黃貫字一之由貢生任主簿有政績歸老日以齒德見重於鄉卒

年九十

黃斗南王大賓二人各輸穀千石備荒有司奏表建坊獎其義  
余友亮汪志鑾唐大湖宋傳各輸穀千石賑貸

錢生輝明末歲貢生歷任貴州龍泉縣父絃科歿母周氏孀居生  
輝奉養盡職遭亂負母登山備歷辛苦母亡哀慟幾殞朝夕坐卧  
苦次事之如生年八十懷慕二親不置祀忠義祠

國朝

向玉階郡庠生康熙二年山賊肆寇玉階居自流井扶父母逃避  
他處母張氏迷路不知所往玉階號泣遍尋三年始得母骸哀慟

瘞之嗣是絕酒葷居常無喜色祀鄉賢祠

李覺慧邑居士因邑遭獻賊甲申之變城市邱墟城隍廟址鞠爲  
茂草矢志募衆修理不憚艱危次第共成三殿事詳覺慧重修城  
隍廟閣碑記

李如蓮字含睿明末流賊屠縣父母不知死所每遇寒食清明見  
人家墓祭卽閉戶不食屢致狂疾家頗富饒因未能致養時行施  
舍捐修鳳凰橋以承親志

趙隆康熙甲子科武舉母病割股和藥以進母病痊子世臣中癸  
酉武舉

陳登魁字逢元康熙甲子科武舉英偉有智畧里人趙應選爲流賊所擄遇登魁得脫收養之後趙姓繁衍奉祀之不衰登魁雖武弁恂恂如書生嘗終年閉戶抄習經書與胞兄愈泰同居至老無間言

汪瓊字子琢歲貢生兄弟九人瓊最長父母歿撫諸弟隨其職業各有成就嘗作自痛吟以致慕思

唐燥事繼母能盡子職族黨稱之

劉琰廩膳生少失恃事繼母以孝聞母疾侍湯藥不懈諸弟皆爲所化邑令俞起運保舉優行

吳君美自幼以孝聞鄉里父母在日從不遠行晨昏冬夏視寒煖奉服食歷終身不衰父母多病恐爲庸醫所誤因習醫學後親病亦瘳

錢萬選字雨金武庠生喜施濟歲荒捐蓮池橋莊內租穀三百一十石周濟貧困里人稱之

易相皇性好施與族鄰貧苦及不能嫁娶殯葬者輒維持資給康熙四十一年邑侯蒲雲鷗以葛天遺老匾表之

萬惇字厚菴性友愛胞兄橙卒撫三姪成名值疫三姪俱亡姪孫栩櫟等皆幼惇移居姪處經紀其喪葬婚嫁十六年及栩等成立



乃歸時鄰人江姓有縱牛躪其姪禾者姪欲與爭惇不許爲擇牧地時其水草歸之日以爲常鄰人感謝自謹鄉里沐其行亦少爭奪者

王執字爾修事繼母能孝家貧作篆書以爲養吏滿赴京考職至龍泉驛遇解課銀者因早行遺銀五十二兩玃拾之坐待黎明遺銀者尋至欲自盡遂還之至河南有人負糧欲鬻妻以償者相對泣別玃詢知爲出銀贖還授八品以親老不仕卒年九十二子升冕邑庠生親歿廬墓以孝聞

李天祥字若實性純和易嘗構新室將成鄰人謂室中有井眼欲報課開鑿其子謀訟官天祥止之令其徧尋新室中竟無井眼可據不與較也胞兄早歿撫胞姪煦中康熙丁酉舉人任河南滎陽令李九文字盈章歲貢生有至性居親喪不作佛事儀節一準家禮葬後寢於靈側朝夕哭奠小祥乃歸同懷兄弟五人皆先卒教諸姪有法倣柳氏小齋每夜聚一書室詢日中所爲事諸姪屏息受訓誠歲以爲常故姪等多登科第入成均彬彬守禮性爽直能面折人是非人皆諒其無曲里族中有詬誶率來質成隨感悅以去卒年七十九子芝戊辰科進士仕湖北宜都令

朱子範名珂以字行邑諸生性孝友好濟貧苦施與若忘人號所

居爲親仁里子振新廩貢生承父志益篤於行邑中有義舉必身爲之倡孫曾科名甚盛人以爲積善之報云

蔡兆鯤字漢冲歲貢生事母張氏以孝聞母歿廬墓側朝夕奠泣闕半載未嘗離時胞兄兆鵬患肺病兆鯤移居共室藥餌必親炙痰穢必親洗半年兆鵬卒哀毀如親喪乾隆元年檄召訓導職口占一聯云已厘風木悲深慙捧檄如毛義漸悟圖書妙敢謂窮經學邵雍不仕卒年七十六

王儀字簡臣貢生持身以禮晚尤好學兵燹後邑中文獻無徵儀手抄縣志六卷藏於家往事得借以傳

龍文遠父病篤哀痛無計割股和藥進父病以愈好施與遇孤貧尤多賑恤子清歲貢生苦志力學次子溢母病亦割股救之得愈王孟芳字鄰軻歲貢生父母歿哀毀骨立與三弟終身同居睦族和鄰人推長者

郭興讓字升如廩生多聞強記性友愛父于蕃宦歸清貧所遺田產悉讓兄弟時論高之

王注仁字挹東廩膳生祖母尤氏苦節晚年多病凡衣被厠器必親注仁手家貧脫粟處之淡然至奉母必致豐潔胞弟有過流涕婉諭時責己子以誠之子樞義中乾隆戊子科舉人

方文秀字明斯母病危割股以進得愈

王朝用字薦昇事兄嫂嚴敬如父母財產多寡不分教姪植舉康熙庚子孝廉任錦屏縣令

董安全割股救母朱氏

李祖暉縣庠生幼失怙母周氏多病割股二次母歿廬於親墓朝夕啼泣兩目俱瞽數年卒於墓側

李莊字敬臨二歲失母鞠於老婦王氏後王氏歿莊爲服喪期年繼母姚氏性褊急莊委曲順承後姚氏愛如已出教胞弟莢異於常人莢早卒無子爲立繼長養教誨如已所生能爲詩古文因養

母教弟未罄所蘊卒年五十八

汪琳字獻之邑廩庠居家孝友賦性和平優於制藝倡首請增縣學八名爲十二名校修本邑志乘纂入通志督工重葺明倫堂邑侯錢經紳重其孝友贈以亦政堂匾額子天潢天河天海天湖俱入縣庠人以爲增學之報

史繼烈本姓張承史燦斗嗣捐腴田一百二十石爲牛皮灘文昌宮焚獻又捐修毘盧寺前中後大殿及山門終身不如葺有善人之目子元碧入邑庠元孫德榮舉孝廉德榮子震成進士鼎附貢生書香世繼

鍾子英豫章人雍正七年在縣西門飯舖生計一日晨起客去掃榻於榻邊拾白銀一百五十兩次日遺銀者尋至子英詢其輕重皆合卽如數還之遺銀者感其義以一半分謝子英堅不受街鄰聞之壯二人義聞之官時知縣俞起運爲懸拾金不昧額旌其店門

榮天佑事親甚謹年二十時母周氏病革沐浴禱祝刲股以進母病旋愈

陳瑜字瑕章郡庠生居心孝友親疾廢寢忘食不解衣帶者三月親歿廬墓晝夜悲號嗣是讀詩至蓼莪每流涕不能竟篇弟兄五

人瑜行三恭兄友弟至老不衰與人晉接和氣春風鄉黨稱爲樂易先生

朱銀河字漢章事親得歡心處兄弟間毫無計較姊適陳世卿夫歿子幼河爲謀薪水成姊之志堂弟銀澗早卒遺孤二歲河撫姪成立孫斗南戊辰領鄉薦旋舉進士珽淦邑庠生

方珏邑貢生幼失恃事父和順婉容舌耕以備甘旨及歿伏棺長號居苦塊不出戶事繼母無異所生其繼母所出兩弟黽勉玉成敦篤友愛生平衣冠不苟端重方嚴人咸敬仰

王樺義字師虞號歷亭注仁子十六歲父母相繼歿事繼母宋氏

如所生與弟據義尤相敦篤戊子領鄉薦任涪州學正

李永儒樂善好施乾隆二年捐金獨造渡船一隻置於賈家渡至十一年助修永濟橋於梅家灘又助修萬壽橋至助修寺觀及棺木湯藥一切周貧濟乏之舉未可悉數

舒翔鳳邑庠性喜施與雍正六年捐修南鄉亂石灘雙全年橋一座又修童家溪畱仙橋又施黃葛渡船一隻歲給渡夫口食子貢生所敬乾隆八年捐銀改修石灰溪圯平橋爲大拱橋一座前令李世官改爲舒公橋教諭魏琮賦橋有詩具載碑碣咸稱父子繼美

張耀吉淳良樸實每遇貧困輒行周濟不形德色乾隆十六年因附近小溪石龍河春水暴發偶溺一人遂捐銀一百五十兩請衆爲首募修捲洞石橋一座人甚便之

楊世鑛勇於尙義捐銀一千兩修永濟橋係榮威富三邑要道杜如楠賦性純樸事親以孝嚴課弟姪俱列膠庠好善樂施寺觀橋渡每多捐助又將沙灣地寬長數百丈捨作義塚人咸德之

陳在政篤友愛伯父世榮早卒孤貧無嗣迎事伯母姜氏二十餘年及卒衣衾棺槨一出已力好義舉近里高灘水極險乾隆壬子捐金修平石橋十餘洞

朱侃字毅菴乾隆己酉由興文學拔貢濶達大度慷慨好施與例用教諭以諸昆弟皆外任州縣遂主家政絕意進取其家法不嚴而肅丁母黃太宜人憂致客數郡中壽遂歿邑侯陸古山一再祭奠涕不自禁家故主鹽筴西商之蒙惠者尤痛悼悲絕子基試輒冠軍甚爲前後學使器重至延入幕時論謂其善必有後云

富順縣志卷二十四

封蔭志

推崇先世延賞後昆作忠廣孝封蔭所原封以子爵蔭以功論榮其祖父賴及子孫旣洽孝思又慰忠魂用紀邑乘疇不銘恩志封蔭第二十四

明

何文秀以子永川封郎中

郭景秀以子廉封御史

黃林以子璿贈郎中 永樂朝中